

"SPARROW TA KEDA SPARROW"

ORANJESTAD(AAN): E aña aki por bisa cu e number Slinger Francisco a bira conoci na Aruba, ora cu DIARIO a menciona cu e ta bini Aruba, y cu ta trata aki di e "Rey mundial di calypso, SPARROW".

Sparrow a pone pia riba Aruba atrobe ayera despues di casi tres aña di ausencia, y hunto cu su agrupacion musical, mañan anochi den San Nicolas Sports Park y diasabra anochi riba The Palm Island, publico lo por goza di un concierto inolvidable un biaha mas, y hasta balia riba ritmonan di e calypsonan cu lo ser toca y canta.

"40 Aniversario di carera musical di Sparrow lo ser presenta na Aruba".

Desde cu el a gana su prome corona na 1956 el a sigui y domina e tereno di calypso cu por lo menos un album pa aña.

RAMON "SPARROW" SHARPE

Un di e fanaticonan mas grandi di Sparrow na Aruba desde su adolescencia te awe ta ningun otro cu "Ramon Sharpe".

Ramon cu for di mucha tabata conoce y canta cada cancion di Lord Melody, Kitchener, Tiger, Atilla, tambe Lord Invador y despues di Sparrow y den transcurso di añanan a bira tambe un amigo grandi di "e rey di mundo di calypso".

Ramon ta conoci como un di e mihornan, si no ta e mihor compositor di calypso di nos isla, y mescos cu Sparrow, por compone riba ki topico y tereno cu ta, cu su mensa-
henan especial.

COMPETENCIANAN

Mighty Sparrow a participa den tanto concurso di ca-

lypso cu na 1974 el a retira 17 aña di competencianan despues di a gana masha hopi corona.

Tabata tin tempo cu ningun hende pora gane y el a dicidi pa duna e jovennan un chance pa gana corona tambe.

Na 1992, mes aña cu el a bishita Aruba pa ultimo vez, ora cu tur hende a kere cu tin talento joven cla pa bay cu e titulo, el a aparece y a domina y gana e corona atrobe, demostrando cu Sparrow tey ainda y pa hopi aña mas.

BIDA DIFICIL

Esnan cu conoce historia di Sparrow, sa con el a lanta den un pobreza y despues cu su mayoman a emigra pa Trinidad y Tobago, e bida dificil a sigui. El a lucha hopi como cantante joven den sitionan di diverticion te cu el a logra su popularidad y fama. Un di e satisfacionnan mas grandi di su bida tabata di por a regala su mama un cas y cu e mama no mester a traha asina duro mas pa cria Sparrow.

Pesey tambe tempo el a retira di competencia, pa jovennan haya lugar, tabata pasobra e tabata sa di e dificil cu ta pa cantantenan joven logra nan carera.

Sparrow no ta solamente canta. E ta entretene su audiencia, comunica cu su publico y na mes momento hata improvisa riba nan.

Sparrow semper tabata tin su propio estilo, pero a sa di bay cu tempo cu cambionan y esey por ripara den su ritmonan di calypso pa soca, tambe pa soul soca fusion cu a domina for di decada 70, e conoci hot soca etc.

Por corda tambe e exito romantico "Only a fool" cu a pone tur hende puntra ta

kende e cantante ey ta, pasobra nunca nan a tende Spar-

row canta un cancion romantico slow y demostra cu

su talento di canto ta multiple.



*Riba e portret adhun-
to por mira Sr. Ricardo Thomas y
Faritah Luidens cu a ricibi
Sparrow y su agrupacion*

*ayera merdia na
Aeropuerto na su yegada.
Hasta su corte di cabay ta
di juventud moderno di*

*awe, cu Sparrow kedando
den presente y no ta "the
old man" manera e mes sa
califica su mes.*